


# Momma Moeng se verrassing

Storie deur Joan Rankin

Illustrasies deur Tamsin en Natalie Hinrichsen



Dit het alles begin toe Momma Moeng 'n fles konfyt vir Gogo Moeng se verjaardag gemaak het. Toe het Baba Beka sy beste blou ballon gevind. Hy wou dit vir Gogo gee vir haar verjaardag.

Momma het vir Baba Beka op haar rug vasgemaak met 'n sagte kombersie. Toe het sy die fles konfyt op haar kop gesit en na Gogo Moeng se huis gestap.

Baba Beka se ballon maak *bompe-kebomp* en Momma se plakkies maak *flip-flap, flip-flap-flop* in die stowwerige paadjie af, tot sy vir Siphon ontmoet wat uit die Tip-Top-winkel kom. "Waarheen is julle op pad, Momma Moeng?" vra Siphon.

"Ek en Baba Beka gaan na Gogo Moeng se huis toe. Dis vandag haar verjaardag," antwoord Momma.

"Ek het 'n pakkie kraakvars skyfies vir Gogo Moeng. Kan ek saamkom?" vra Siphon.

"Natuurlik," glimlag Momma en daar gaan hulle.

Siphon se pakkie kraakvars skyfies maak *girts-garts*, Baba Beka se ballon maak *bompe-kebomp* en Momma se plakkies maak *flip-flap, flip-flap-flop* in die stowwerige paadjie af, tot hulle by mnr. Chapalala kom wat sy hoenders kos gee.

"Waarheen gaan julle?" vra hy.

"Ons gaan na Gogo Moeng se huis toe. Dis haar verjaardag," antwoord Momma.

"Ek het 'n lekker vet hoender vir Gogo Moeng. Kan julle dit vir haar neem?" vra mnr. Chapalala.

"Natuurlik," sê Momma. Sy sit die vet hoender onder haar arm en daar gaan Momma, Baba Beka en Siphon.

Die vet hoender maak *pe-kêk, pe-kêk, pe-kêk*, die pakkie kraakvars skyfies maak *girts-garts*, Baba Beka se ballon

maak *bompe-kebomp* en Momma se plakkies maak *flip-flap*, *flip-flap-flop* in die stowwerige paadjie af, tot hulle by mev. Makabelo se koekwinkel kom.



“Ons moet ’n verjaardagkoek vir Gogo koop,” sê Momma. Hulle gaan binnetoe. *Tieng-’n-lieng* lui die deureklokkie. “Goeiemôre, mev. Makabelo. Het jy geweet dit is vandag Gogo Moeng se verjaardag?”

“O, ja,” sê mev. Makabelo. “Ek het ’n spesiale koek vir haar gebak, maar ek kan nie die winkel alleen laat nie. Kan julle dit vir haar neem?”

“Natuurlik,” bied Momma aan, maar daar is ’n probleem – Momma het twee hande nodig om die koek te dra. Toe maak sy ’n plan. Sy sit die vet hoender bo-op die fles konfyt wat sy op haar kop dra. Nou het sy twee hande om die spesiale verjaardagkoek te dra. En so stap Momma, Baba Beka en Siphon uit by die *tieng-’n-lieng*-deur.

Toe Baba Beka die koek ruik, sê hy: “Njammie, njammie, njam, njam.”

Die vet hoender maak *pe-kêk, pe-kêk, pe-kêk*, die pakkie kraakvars skyfies maak *girts-garts*, Baba Beka se ballon

maak *bompe-kebomp* en Momma se plakkies maak *flip-flap*, *flip-flap-flop* in die stowwerige paadjie af, tot hulle vir Valecia ontmoet.

“Waarheen gaan julle almal?” vra Valecia.

“Ons gaan na Gogo Moeng se huis toe. Dis haar verjaardag,” verduidelik Siphó.

“Ek het ’n bos blomme vir Gogo Moeng. Kan ek ook kom?” vra Valecia.

“Natuurlik,” sê Momma, en daar gaan hulle.

Die bos blomme laat Valecia nies: “*Atiesjoe! A-A-Atiesjoe!*”

Die vet hoender maak *pe-kêk*, *pe-kêk*, *pe-kêk*, die pakkie kraakvars skyfies maak *girts-garts*, Baba Beka se ballon maak *bompe-kebomp* en Momma se plakkies maak *flip-flap*, *flip-flap-flop* in die stowwerige paadjie af, tot hulle vir mnr. Sithole sien wat in sy groentetuín skoffel.

“Waarheen gaan julle almal, Momma Moeng?” vra mnr. Sithole.

“Ons gaan na Gogo Moeng se huis toe. Dis haar verjaardag,” antwoord sy.

“Ek het ’n trollie vol groente vir haar,” sê mnr. Sithole. “Kan julle dit asseblief vir haar neem?”

“Natuurlik,” antwoord Momma.

Maar nou het Momma ’n GROOT probleem – daar is te veel goed om te dra! Sy moet aan ’n plan dink.

Eers haal sy vir Baba Beka van haar rug af en bind toe die vet hoender met die sagte kombersie op haar rug vas. Baba Beka *SKREEU!*

Momma sit toe die vet hoender bo-op die trollie en maak weer vir Baba Beka met die sagte kombersie op haar rug vas. Baba Beka is tevrede en die vet hoender is baie gelukkig, want sy kan aan al die groente pik. Maar Momma is nie gelukkig hiermee nie, en daarom sit sy die vet hoender op Valecia se kop. Die vere kielie Valecia se neus en laat haar nog meer nies: “*AAAAA-TIESJOOE!*”



Valecia is nie gelukkig nie. Momma vat toe die vet hoender en sit dit op Siphos se kop. Sy gee ook vir hom Valecia se blomme om vas te hou. Nou het Valecia twee hande vry om die koek vas te hou. En Momma het twee hande vry om die trollie te stoot. Almal is gelukkig en daar gaan hulle na Gogo Moeng se huis toe.

Die wiele van die trollie maak *skwiek-skwiek-skwiek*. Valecia het van die koek se versiersuiker op haar wange, en haar tong lek *slurp-slurp-slurp*. Baba Beka sê: “Njammie, njammie, njam-njam.” Die vet hoender maak *pe-kêk, pe-kêk, pe-kêk*, die pakkie kraakvars skyfies maak *girts-garts*, Baba Beka se ballon maak *bompe-kebomp* en Momma se plakkies maak *flip-flap, flip-flap-flop* in die stowwerige paadjie af al die pad tot by Gogo se huis.

Momma klop aan die voordeur. Siphos fluit. Valecia roep. Maar daar is GEEN ANTWOORD nie. Momma stoot die voordeur oop en hulle gaan almal binne. Maar daar is NIEMAND DAAR NIE. Hulle kyk in die kombuis – NIEMAND nie. Hulle kyk in die slaapkamer – NIEMAND nie. Hulle kyk oral. Waar kan Gogo wees?

Momma sê: “Kom ons begin kos maak, en dan sal Gogo dalk opdaag.”

En dis toe wat almal doen – almal behalwe Baba Beka. Hy sit op die kombuistoonbank langs die venster en uitkyk tot hy

Gogo doer onder in die paadjie aan die voet van 'n baie steil bult sien stap.

“Gogo! Gogo!” roep hy. Almal kyk.

“GOGO! GOGO!” almal roep tegelyk. “GOGO!”

Doer onder aan die voet van die steil bult sê Gogo: “EE EE. Iemand roep my. Nou kan ek nie winkel toe gaan om my verjaardagete te koop nie.”

Gogo draai om en stap al die pad met die steil bult op. Haar pantoffels maak *slof-slof* in die stowwerige paadjie af. Uiteindelik kom sy by die agterdeur. Toe sy dit oopmaak, begin almal vir haar 'n verjaardag liedjie sing.

Op die tafel is die groentepastei en konfyttertjies wat Momma gemaak het, eiers wat die vet hoender so pas gelê het, die spesiale verjaardagkoek en die kraakvars skyfies. Die tafel is versier met die blomme en Baba Beka se pragtige blou ballon.

“DIT IS MY BESTE VERJAARDAG OOI!” sê Gogo. En sy behoort te weet, want Gogo het al ten minste tagtig of negentig verjaardae voor hierdie een gevier!



**WEES KREATIEF!**

- Maak 'n lys van al die dinge wat die mense in die storie gee om Gogo se verjaardag spesiaal te maak. Voeg nou drie dinge by wat jy graag sal wou gee as jy vir Gogo op haar verjaardag kon gaan kuier.



# Momma Moeng se verrassing

Storie deur Joan Rankin • Illustrasies deur Tamsin en Natalie Hinrichsen

## Visueel

Kies 'n deel van die storie wat nie 'n illustrasie het nie en teken 'n prent daarvoor. Skryf die woorde van die storie wat by die prent pas, oor of vra iemand om jou te help om dit te doen. Heg die storietekste aan die onderkant van jou prent vas.



## Lees

Lees die storie hardop en konsentreer op hoe jy die woorde soos *flip-flap*, *bompe-kebomp* en *tieng-'n-lieng* uitspreek. Voeg liggaamsbewegings by om te pas by die woorde wat klanke voorstel, wanneer jy dit sê. As iemand die storie vir jou moet lees, sê die woorde wat klanke voorstel, saam met hulle.



## Skryf

Maak 'n lys van al die dinge wat die mense in die storie gee om Gogo se verjaardag spesiaal te maak. Voeg nou drie dinge by wat jy graag sou gee as jy vir Gogo op haar verjaardag kon gaan kuier.



## Handwerk

Maak 'n verjaardagkaartjie vir 'n vriend of familielid wat binnekort hulle verjaardag gaan vier.



## Speel toneel

Kyk na die prent van Valecia, Siphon en Momma op bladsy 4. Wat dra elkeen van hulle? Vind voorwerpe wat jy kan gebruik om te maak asof dit is wat Valecia, Siphon en Momma dra. Probeer rondloop soos Valecia, dan Siphon en dan Momma terwyl jy hierdie goed dra.

